

आकाशवाणी जयपुर-अजमेर
प्रादेशिक समाचार ।
दिनांक 12.05.2024 समय: 18.45 बजे

- लोकसभा चुनाव रे चौथे चरण रे तैत काले 96 संसदीय सीटां माथे व्हेला मतदान ।
- प्रदेश मांय आंधी बिरखा री गतिविधियां सूं बढती गर्मी सूं थोड़ी घणी राहत-आवता दो दिनां मांय सामान्य तापमान री आस ।
- प्रदेशभर मांय अंतर्राष्ट्रीय नर्सज दिवस अर मातृ दिवस माथे न्यारा न्यारा कार्यक्रमां रो आयोजन ।
- आईपीएल क्रिकेट टूर्नामेंट मांय आज राजस्थान रॉयल्स चैन्नई सुपरकिंग्स से सामे जीत खातिर 142 रन रो लगस राख्यो ।

000

लोकसभा चुनाव रे चौथे चरण रे तैत काले नौ राज्यां अर एक केन्द्र शासित प्रदेश री 96 सीटां माथे वोट डाल्या जावेला । ई चरण मांय आंध्र प्रदेश री 25, तेलंगाना री 17, उत्तर प्रदेश री 13, महाराष्ट्र री 11, मध्यप्रदेश अर पश्चिम बंगाल री आठ-आठ, बिहार री 5, झारखंड अर ओडिशा री चार-चार अर केन्द्र शासित प्रदेश जम्मू-कश्मीर री एक सीट माथे मतदान व्हेला । इण चरण मांय कुल एक हजार सात सौ 17 उम्मीदवार मैदान मांय है । मतदान सुंवारे सात सूं सिंज्या पांच बज्या ताई चालेला । इण खातिर तियारियां पूरी व्हे गयी है ।

000

प्रदेश मांय लारल 24 घंटां रे चालता केई ठोडां माथे आंधी-बारिश री गतिविधियां सूं लोगां ने बढते तापमान सूं कुछेक राहत मिळी है । मौसम महकमा रे मुजब घणखर ठोडां माथे बत्ती ऊं बत्ती तापमान 38 सूं 43 डिग्री सैल्सियस दरज करी ज्यो । जयपुर, जोधपुर, उदयपुर अर बीकानेर संभागां मांय तापमान सामान्य रह्यो वठी ने अजमेर अर कोटा संभाग मांय बत्ती ऊं बत्ती तापमान सामान्य सूं कम दरज करी ज्यो । महकमा रे मुजब सुंवारे साढे आठ बज्यां पूरा व्ह्या 24 घंटां मांय सब सूं बत्ती तापमान फलौदी मांय 43 दशमलव 2 डिग्री सैल्सियस दरज करी ज्यो ।

महकमा रे मुजब आवण वाळा दो दिनां मांय जयपुर, अजमेर, कोटा अर उदयपुर संभाग रा जिलां मांय सामान्य रे आसे-पासे तापमान बण्यो रेहवण री आस है । वठी ने जोधपुर अर बीकानेर संभाग रा जिलां मांय पारे मांय 1 सूं 2 डिग्री सैल्सियस री कमी व्हे सके है । इण रे चालता गर्म हवावां अर लू सूं प्रदेशवासियां ने थोड़ी घणी राहत रा आसार है । उदयपुर अर जोधपुर संभाग रा केई

ठोडां माथे 13 सू 15 मई रे बीचे बादल गरजणे रे साथे ही आंधी अर बिरखा री आस है। महकमां रे मुजब 16 मई सू प्रदेश मांय एक और नुवी हीट वेव रो दौर सरू होणे री आस है। इस बीच मौसम मांय बदलाव सू शेखावाटी खेतर रा जिलां मांय भी लोगां ने तेज गर्मी सू राहत मिली है। नीम का थाना मांय काले रात 4 घंटा री बिरखा रे पाछे आज दिनभर मौसम सुहावणो बण्यो रह्यो।

.....

दूजी कानी केई ठोडां माथे पारा मांय तल्खी बणी रेहवण सू जनजीवन माथे घणो असर देख्यो गयो है। चूरू मांय दोपहरां लू री स्थिति री। झालावाड़ मांय तेज गर्मी री वजह सू गळियां अर बाजार सूना दिख्या। सरहदी जिला जैसलमेर मांय आज दिनभर तगड़ी गर्मी री। भीषण गर्मी ने देखता थकां अतिरिक्त जिला कलेक्टर विद्युत महकमां रा अहलकारां री बैठक ली अर बिजली आपूर्ति बिना रूक्या बणाये राखणे खातिर हुकम दिया। वठी ने जिला क्रिकेट संघ कानी सू इंदिरा स्टेडियम मांय पंछियां खातिर परिंडा लगाया अर दाणा री व्यवस्था करीजी। बाड़मेर मांय भी नगर परिषद री कानी सू पंछियां अर पशुवां खातिर परिंडा अर खेती लगा र राहत दी जा रही है।

000

प्रदेश मांय मौसमी बीमारियां री प्रभावी मॉनिटरिंग खातिर चिकित्सा महकमा री ओर सू ओडीके एप तैयार कर्यो गयो है। इण नवाचार सू मौसमी बीमारियां री स्थिति री रियल टाइम मॉनिटरिंग व्हे सके है अर बचाव अर रोकथाम खातिर बेगा ई कारगर कदम उठाया जा सके है। चिकित्सा अर स्वास्थ्य महकमा री अतिरिक्त मुख्य सचिव शुभ्रा सिंह बतायो कि एप रे जरिये वर्षाकाल रे चालता मलेरिया, डेंगू अर चिकुनगुनिया रे तेजी सू बधणे पर भी कारगर सुविधावां विकसित करणे मांय सहायता मिल सकेली। ओडीके एप रो खास लगस माछरजनित बीमारियां रे मामलां मांय कमी लागो है।

एप रे माध्यम सू माछरां रे प्रजनन री जगावां अर लार्वा पाया जावण वाळी जगावां री फोटो ले र स्वायत्त शासन महकमो या पंचायती राज महकमे ने भेज्यो जावेला। इण रे आधार माथे बचाव अर चिकित्सा रा उपाय बेगा ई पुख्ता कर्या जावेला।

000

जोधपुर मांय पुलिस एक फैक्ट्री माथे छापो मार र 100 करोड़ रूपया सू बत्ती री नशीली सामग्री जपत करी। मुंबई पुलिस रो खास दळ मोगड़ा मांय सर्विस सेंटर री आड़ मांय चाल री इण फैक्ट्री माथे दबिश दे र लगे-टगे 68 किलो एमडी जपत करी। जयपुर मांय पुलिस बिंदायका सू मादक पदार्थां रे एक तस्कर ने गिरफ्तार कर उणे कने सू पौणे दो किलो गांजो बरामद करयो है।

अतिरिक्त पुलिस आयुक्त नीरज पाठक बतायो के आरोपी कॉलेज अर विश्वविद्यालय रे आसे-पासे मादक पदार्थां री सप्लाई करतो हो। तस्कर सूं पूछताछ जारी है।

.....

आज अंतर्राष्ट्रीय नर्सज दिवस है। ओ दिन मानवता ने समर्पित प्रसिद्ध नर्सिगकर्मी फ्लोरेंस नाइटिंगेल री याद मांय मनायो जावे है। इण मौके माथे प्रदेशभर मांय केई कार्यक्रम राख्या गया। पाली रा बांगड सफाखाना मांय जळसो राख्यी ज्यो।

नर्सिगकर्मी मोमबत्तियां जला र समाज सेवा री शपथ ली। बीकानेर रा राजकीय नर्सिग स्कूल अर ट्रोमा सेंटर साथे दूजी ठोडां माथे कार्यक्रम राख्या गया। नर्सिग दिवस रे मौके माथे बारां मांय थेलेसीमिया सूं पीड़ित टाबरां खातिर रक्तदान शिविर लगायो गयो। अजमेर रा जेएलएन मेडिकल कॉलेज मांय नर्सिगकर्मियां री कानी सूं सांस्कृतिक कार्यक्रम राख्यो गयो। सांचौर जिला सफाखाना मांय राख्यी ज्या कार्यक्रम मांय फ्लोरेंस नाइटिंगेल री तस्वीर माथे माळा अर्पित करी। टोंक मांय नर्सिगकर्मी सामूहिक रूप सूं केक काट र नर्सिग री प्रणेता सुश्री नाइटिंगेल ने सिरधाजलि दी। झुंझुनूं रा जिला सफाखाना मांय सांस्कृतिक कार्यक्रम मांय प्रशिक्षु नर्सिगकर्मी भेळा व्ह्या। इण मौके माथे मरीजां ने फळ बांट्या गया। कार्यक्रम मांय सेवानिवृत्त नर्सज रो सम्मान करयो गयो। केकडी मांय इण मौके माथे नर्सिगकर्मियां रो सम्मान करयो गयो अर जिला सफाखाना ने राष्ट्रीय स्तर माथे सर्टिफाइड करणे खातिर मिल र जतन करणे रो हेलो करयो। जोधपुर ग्रामीण मांय पीपाड सफाखाना मांय कार्यक्रम राख्या गया। इण मौके माथे नर्सज एसोसिएशन री कानी सूं पंछियां खातिर परिंडा लगाया गया। वठी ने दौसा मांय मुख्य चिकित्सा अहलकारां री अध्यक्षता मांय जळसो राख्यो गयो।

नर्सज दिवस माथे प्रदेश रा राष्ट्रीय पुरस्कार पावण वाळा वरिष्ठ नर्सिगकर्मी राजकुमार राजपाल आकाशवाणी रे जरिये आपरो संदेश साझा कर्यो—

.....

जयपुर रा वरिष्ठ नर्सिग ऑफिसर रमेश सैनी भी इण मौके माथे नर्सिगकर्मियां री भूमिका ने याद कर्यो।

.....

आज दुनिया भर मांय मातृ दिवस मनायो जा रियो है। ओ दिन मातावां रे प्रति सम्मान अर कर्तज्ञता जतावण खातिर हर बरस मई म्हीने रे दूजे रविवार ने मनायो जावे है। मातृ दिवस रे मौके माथे प्रदेशभर मांय केई कार्यक्रम राख्या गया। केई संस्थावां अर संगठनां कानी सूं मातावां रो सम्मान करयो गयो। भरतपुर मांय प्रजापिता ब्रह्मा कुमारी ईश्वरीय विश्वविद्यालय कानी सूं मातावां रो अभिनंदन अर संगोष्ठी रो कार्यक्रम राख्यो गयो। बूंदी मांय मातृ दिवस रे मौके माथे महिलावां खातिर आयुर्वेद महकमा री कानी सूं स्वास्थ्य जागरूकता शिविर लगायो गयो। चूरू मांय

विकास समिति री कानी सूं मातावां रो सम्मान जळसो राख्यी ज्यो। इण मौके माथे बेटियां आपरी मातावां रा चरण धो र वां री वंदना करी।

पाली मांय जिला प्रशासन अर महिला अधिकारिता महकमा री कानी सूं जागरूकता कार्यक्रम राख्यी ज्या।

000

राजसमंद मांय आज राष्ट्रीय राजमार्ग 8 माथे भगवानदा खुर्द रे कने ट्रेलर री टक्कर सूं मोटरसाईकिल सवार दम्पत्ति री मौत व्हे ग्यी। सूचना मिलने माथे राजनगर पुलिस मौके माथे पहुंची अर मामलो दरज कर्यो। पुलिस रे मुजब हादसे रा शिकार दम्पत्ति कांकरोली सूं दवाई ले र आपरा गांव पसूंद जा रिया हा। एक दूजे सड़क हादसे मांय ब्यावर-विजयनगर राजमार्ग माथे ट्रक री टक्कर सूं बाइक सवार तीन मोट्यारां री मौत व्हे ग्यी। मृतक भीलों का बाड़ियां सथाना रा रेहवण वाळा हा अर मजदूरी कर र घरे आ रिया हा।

000

आखी दुनिया मांय सनसिटी अर ब्ल्यू सिटी रे नाम सूं पिछाण राखण वाळो जोधपुर शहर आज आपरो 566 वों थापना दिवस मनायो। इण मौके महारानगढ़ म्यूजियम ट्रस्ट री कानी सूं जळसो राख्यो गयो। कार्यक्रम मांय राजपिरवार रा सदस्य अर पैल्या आळा सांसद गजसिंह जी चोखा काम करण वाळी शहर री प्रतिभावां ने सम्मानित करयो। घणो ब्योरो म्हाणा जोधपुर संवाददाता सूं-

.....

राजस्थान मेडिकल सर्विसेज कॉरपोरेशन री कानी सूं काले जयपुर मांय बायोमेडिकल इक्विपमेंट मैनेजमेंट प्रोग्राम बूस्ट रे तैत राष्ट्रीय कार्यशाला राख्यी ज्यी। कार्यशाला मांय मेडिकल सर्विसेज कार्पोरेशन रा अहलकार अर राष्ट्रीय स्वास्थ्य मिशन रा विशेषज्ञां रे साथे देशभर सूं न्यारा न्यारा प्रदेशां रा नोडल अधिकारी अर बायोमेडिकल इंजीनियर भाग लेवेला। इण मांय चिकित्सा संस्थानां मांय स्वास्थ्य सेवावां ने बेहतर बणाणे खातिर बायोमेडिकल उपकरणां रा प्रबंधन अर रख रखाव सूं जुड्या विषयां माथे चर्चा करी जावेली।

000

आईपीएल क्रिकेट टूर्नामेंट मांय आज राजस्थान रॉयल्स और चैन्नई सुपरकिंग्स रे बीचे मैच खेल्यो जा रियो है। चैन्नई मांय चाल रिया इण मैच मांय रॉयल्स पेले बल्लेबाजी करत व्ह्या तैय 20 ओवर मांय 141 रन बणाया। जवाब मांय चैन्नई री टीम समाचार लिख्या जावण ताई 4 विकेट माथे 115 रन बणा लिया। अंक ताळिका मांय दूजे नम्बर माथे चाल री राजस्थान रॉयल्स री टीम इण मैच ने जीतणे रे साथे अंतिम 4 मांय जगह बणा लेती। जदे कि चैन्नई सुपरकिंग्स खातिर

लीग मांय बण्या रेहवण वास्ते आज रो मैच खास है। लीग रा ऐ दूजा मैच मांय सिंज्या साढे सात बज्यां सू रॉयल चेलेन्जर्स बेंगलुरु अर दिल्ली केपिटल्स रे बीच मुकाबलो व्हेला।

000